

Concierto di Coro Mélange y Ivan Jansen Quartet



ORANJESTAD - Riba diadomingo mainta 8 di juni lo tin un concierto di e coro Mélange, bao guia di Maybelline Arends-Croes y di e conocido guitarista Ivan Jansen cu su cuarteto. E concierto aki ta bao di auspicio di Circulo Arubano Pro Arte y ta tuma lugar na Holiday Inn Hotel, Las Palmas Ballroom, cuminsando pa 11'or di mainta.

Mélange ta un coro di adulto cu a ser lanta na Augustus 1994. E miembronan di coro a scoge e nomber Mélange como cu a uni dos coro existente, esta Fuga y Cristal, pa forma e grupo Mélange. E coro ta canta regularmente durante celebracion eucaristico na Misa den weekend y tambe pa Pasco di Nacemento, Pasco grandi y otro dianan di fiesta di iglesia tambe. Ultimamente nan a canta un Misa completo, tanto pa e apertura di e celebracion di e Aña di Hubileo di obispado di Antiyas/Aruba,

como pa e celebracion principal na Aruba riba 4 di mei ultimo. Ademas nan ta canta na actividadnan social y cultural. Mélange a yega di saca un CD 'religioso' titula "Duna Amor" cu canticanan di bon mensahe (inspirational songs), tambe algun single cu grabacionnan pa Pasco of otro temporada di aña.

E guitarista Arubiano Ivan Jansen, ta hopi conoci pa su diferente conciertonan, tanto clasico como di jazz y tambe pa e bunita CDnan cu el a yega di saca, esta Con Alma I, Con Alma II y Versatility. Ultimamente el a saca un CD nobo titula 'Jazz at the Links' riba cuale ta toca cu su cuarteto. E cuarteto ta consisti di Ivan na guitarra; Franklin Granadillo, trompet; Roy Croes na baho y Richard Holmond na bateria. E cuarteto aki di cual mayoria di e musiconan a sigui nan estudio na e prestigioso

Berklee College of Music na Boston, ta toca na "Windows on Aruba" na Divi Links. Hopi persona eynan a acerca nan cu e pregunta si nan tin un CD cu e piesanan cu nan ta toca. Esaki a conduci na saca e CD aki.

Sergio Jansen, yiu homber di Ivan tambe lo presenta hunto cu e cuarteto. Sergio ta guitarista y estudiante na Berklee College of Music na unda el a ricibi un Outstanding Musicianship Award recientemente.

Durante e concierto aki e

publico por tende diferente di e piesanan bunita cu ta riba e CD aki entre otro boleros, pop jazz, musica Brasileiro y piesanan di compositornan local. Esaki lo bira un concierto hopi special.

Entrada general ta fl. 35,-; miembro ta paga fl. 25,- y carchi pa hubentud ta fl. 15,-. Por cumpra carchi cerca e miembronan di coro Mélange y e integrantenan di Ivan Jansen Quartet y si resta na porta Diadomingo mainta na Holiday Inn Hotel.

